

劝修净土诗

清·省庵大师

劝修净土诗（并叙）

清·省庵大师

实贤谏劣庸僧，褊卑陋器，本无大力，仰承前辈宗风，时有好怀，独结西方净愿，虽躬行不逮，原无实得于自心，而兼济未忘，乃有愚衷于此世。原夫净土一门，理极顿圆，事诚简易，在因强而得果疾，用力少而成功多。浅之则夫妇与知，深之则圣贤莫测。三根普被，万类均收。捞漉苦海之鱼，信为巨网；挽回末法之症，的是奇方。离斯捷径，出生死以奚从？舍此法门，脱轮回而何日？

但今时泛念者多，深信者少。或有诤为著相，贬作小乘，并由不读教文，只是任凭胸臆。岂知中天调御开金色口以叮咛，十方如来出广长舌而赞叹。文殊、普贤尚有求生之偈，马鸣、龙树亦有愿往之文。至于智者、永明之辈，中峰、天如之流，并是教祖禅宗，莫不垂文著论，阐明至理，深劝后人。奈何末代凡夫，钝根浅识，乃欲远胜

古人，置之弗屑邪？

实贤因此感慨，尝欲发挥论议，解释疑情，于乙未秋，著诗三十首，一时草草付工刊版。惜乎理未周圆，事多疏漏，每欲从事添削，不遑下手。

戊戌夏，依绍昙老人于隆兴精舍，学律安居，听经坐腊，自恣既竟，同学摄兄踊跃赞叹，怱怱卒业。由是芟其繁苒，补其阙略，理随事广，语逐文多，不觉信笔任心，盈编成册。于中铺陈依正，描写庄严，广破群疑，深彰一理，指示工夫，以知操守，分张品类，以劝修行。于是总陈三教，别派众流，所谓仕隐工商、渔樵耕读，乃至苦乐闲忙之辈，生老病死之人，莫不皆导以念佛，示其往生。凡一日二六时中，每年十二月内，无时非念佛之时，无月不思归之月。所以一其念，专其志也。

夫信是道原，故首标依正以起信；疑为信障，故次释人情以破疑；疑障既除，信心堪发；信心既发，正行斯遵，故授之以工夫途路，非徒自善，尤宜利他。语贵随机，事须逗巧，故分之以品第人伦。然有行无愿，终不往生，有念无观，亦难见佛，故授之以恒时运想，频月致怀。末则总叹娑婆之苦，同归净土之乐，伸明信愿，结劝往生。

盖净土法门，不出信、行、愿三，故为次第如此。

诗成，新旧共得一百八首，虽非法海之全珠，亦是义山之片石。文诚粗疏，语颇切实。伏乞观者，知我苦心，鉴兹不逮，略其词而察其意，行其事以践其途，庶几同脱苦轮，尽超乐土。幸勿因人废言，徇名弃实，是所至望。

我教原开无量门，就中念佛最为尊。
都融妄念归真念，总摄诸根在一根。
不用三祇修福慧，但将六字出乾坤。
如来金口无虚语，历历明文尚具存。（一）

一入西方境自融，双眸顿觉翳销镕。
无边刹土光中现，遍界真身象外逢。
华衬玉栏红隐隐，树含金殿碧重重。
色空混合浑无寄，镜像分明绝点踪。（二）

境胜由来道易修，多生习气一朝休。
盘中甘露珠圆转，树上摩尼水倒流。
碧玉莲台承足稳，真金华瓣衬身柔。
三车已息驰求念，露地安然坐白牛。（三）

琉璃地上绝尘埃，宴坐经行亦快哉。

锦绣织成行树叶，丹青画出众楼台。
漫空华雨诸天下，遍界香云大士来。
何处忽生新佛子？芙蓉又见一枝开。（四）

土净能令心自空，无边妙色现其中。
千灯互照身光映，十镜交辉佛土融。
珠网重重悬宝树，天童历历在华宫。
龟龄鹤算浑闲事，直得虚空寿量同。（五）

称性庄严非外得，天然果报自无穷。
一尘遍入诸尘里，万法全收一法中。
华映玉池人倒影，身游佛国地俱空。
色心依正原无碍，但得情忘境自融。（六）

琼枝瑶草色长新，别有乾坤世外春。
红藕华藏金砌鸭，绿珠帘映玉楼人。
尘沙莫计声闻辈，海水难量大士伦。
博地亦能容入会，何时得与圣贤亲？（七）

寂静身心自偶谐，寻常历览兴无涯。
金幢倒映琉璃地，玉砌平铺玛瑙阶。
自有好华堪供佛，更无尘事可干怀。
何时得遂平生志，坐对鸳鸯水上排。（八）

我佛慈悲相好身，随机应现不同伦。
尽虚空界元同体，极一微尘总是真。
叠叠髻螺山顶绿，弯弯眉相月钩新。
七重树下金莲上，处处追陪二大人。（九）

相好凡夫皆具足，六通无碍异常伦。
直将果用为吾用，不改凡身作佛身^①。
周顾十方同指掌，遍游诸国似比邻。
回观此土修行者，龌龊生涯太苦人。（十）

彼方殊胜事无穷，依正由来总不同。
铲尽青山铺碧玉，收干沧海出虚空。
法音自演风柯里，妙义频宣水鸟中。
诸佛众生同一体，互相周遍尽圆融。（十一）

净土因何独指西？要令心念有归栖。
一门入后门门入，初步迷时步步迷。
直就下凡阶上圣，不离烦恼证菩提。
莲华胜友应相待，何日归来手共携？（十二）

如来本愿非虚诳，称我名皆到此中^②。

① 净土一生成佛，更无中阴入胎之事，唯除愿力欲往他方世界度众生者。

② 《大弥陀经》云：“设我得佛，十方众生，至心信乐，欲生我国，乃至十念，若不生者，不取正觉。”

莫患棘墙^①无客住，只愁枷锁^②几时空^③。
百川归海水宁溢？万国朝王地岂穷^④？
易往无人真可惜，不知何事恋樊笼。（十三）

人传天竺是西方^⑤，天竺支那在足傍^⑥。
莫向泥途分净秽^⑦，休从火宅辨炎凉^⑧。
三千世界非吾土^⑨，万亿乾坤是故乡^⑩。
去去莫愁途路远，不劳弹指见空王^⑪。（十四）

莫说西方为譬喻^⑫，须知名与实相应。
譬甜似蜜非无蜜，喻冷如冰却有冰。
槐国阿谁招客去？蜃楼何处劝人登？
如来大圣成虚妄，谤法愆尤忤未曾？（十五）

① 三界。

② 贪爱。

③ 或曰：若世间人皆往生西方，则此方谁住？故以此喻晓之。

④ 或曰：若世间人皆往生，则众生甚多，彼国如何容受？故以此释之。

⑤ 世传西方去此十万八千里，是错认五天竺国为西方也。

⑥ 天竺人呼东土为支那，天竺、支那同在南瞻部洲，足迹可到。

⑦ 同居五浊，宁分净秽。

⑧ 同居三界，奚别苦乐。

⑨ 四大部洲、须弥山、六欲天各满一千，名小千世界；千个小千世界，名中千世界；千个中千世界，名大千世界。总此三千大千世界，名为娑婆世界，皆释迦牟尼一佛所化之境也。

⑩ 极乐去此十万亿三千大千世界。

⑪ 天台云：“临终在定之心，即净土受生之心，动念即是生净土时。”

⑫ 有人云：西方是譬喻之说，乃诱引凡愚为善，非实事也。

人言肃杀是西方，死后身空堕渺茫^①。
身毒应无生博望^②，岐山那有活文王^③？
众诸侯各朝天子^④，四大洲殊睹日光^⑤。
但得往生休恐怖，应知寿命实难量^⑥。（十六）

都言念佛是愚夫，得作愚夫亦已夫。
龙树辩才还拙否^⑦？文殊智慧是虚无^⑧？
主人底事凭居易^⑨，公据何人问大苏^⑩？
寄语聪明宜念佛，阎君应不爱之乎。（十七）

① 有人云：西方是肃杀之气，人死归空，生气殄灭，即是西方，岂真有西方可生乎？

② 身毒即天竺国，汉博望侯张骞曾至其地。

③ 岐山在西夷，文王所生之地。

④ 问：何故极乐在西？答：极乐非定在西，但对东言西，譬如天子所都，名曰长安。诸侯朝天子，四方来者不一。东方来者，则曰长安在西。西方来者，则曰长安在东。长安定有东西乎？弥陀所都，名为极乐，十方菩萨皆愿往生。东方生者，即言极乐在西。西方生者，即言极乐在东。极乐定有东西乎？

⑤ 四大洲，谓东胜身洲、南瞻部洲、西牛货州、北俱卢洲。殊睹者，日月环绕须弥山，照四大洲，东洲日没，南洲日中，西洲日出，北洲半夜。四洲人并指日出处为东，日没处为西。则南洲西方，即是西洲之南。北洲之东，东洲之北矣。方位宁有定乎？

⑥ 《大弥陀经》云：“我刹中人，寿命皆无央数劫。”

⑦ 龙树菩萨造《毗婆沙论》，发愿往生。

⑧ 文殊菩萨《往生偈》云：“愿我命终时，尽除诸障碍，面见阿弥陀，往生安乐国。”

⑨ 东坡诗云：“乐天不是蓬莱客，凭仗西方作主人。”

⑩ 东坡南行，唯带阿弥陀佛一轴，曰：“此轼西方公据也。”

六字真经堪读诵，谁言名字假非因^①？
即名显体方称妙，托境观心易入真^②。
螺赢祝儿终肖父^③，蛄蜣丸粪亦遗尘。
劝君早发西归愿，臭秽何容恋此身？（十八）

娑婆魔外事纵横，寂灭无如安养城。
苦乐双忘名极乐^④，死生俱尽说无生^⑤。
佛无彼此皆同体^⑥，地有东西是假名。
何事劝人生彼国？只缘此土道难成。（十九）

若执往生为妄想^⑦，岂言住此便成真^⑧？
东西不著尤非理^⑨，净秽双忘亦是尘^⑩。

① 有人言，名字属假，非成佛因，岂有念假名而成真佛。

② 六字洪名为境，四性叵得为观。

③ 螺赢衔桑虫于穴中，呼祝七日，则还肖其父。众生念弥陀于心内，持名一世，安得不肖佛。

④ 或谓求生西方，是自贪快乐，非为了道。不知言极乐者，苦乐两忘，方名极乐。若对苦说乐，是人天之乐，不名为极。

⑤ 问：既说往生，即有生死，云何言无生？答：谓达生体本空，故生即无生。又接引初机，权说往生。生已亲证，始知无生。

⑥ 又问：何不念释迦，而反念弥陀？不念十方诸佛，而念一佛？答：念弥陀，即是念释迦。念一佛，即念十方诸佛。以佛佛道同故，顺本师教故，心得专一故，又弥陀与此土众生偏有因缘故。

⑦ 或谓念佛是摄妄想一法，若求生西方，翻成妄想。

⑧ 若言生西是妄想，则住著娑婆，妄想尤甚。

⑨ 若言我今不求生彼，亦不住此，二俱不著，随意受生。此尤非理。何者？既非法身大士，又非应化圣人，欲爱未除，业缘未断，若不生西方，定生此土。既生此土，则仍在轮回。业力所牵，三途有分，安能随意受生耶？

⑩ 只此净秽双忘一念，亦是情计，尚属法尘所摄。若真双忘，则何碍求生。

生本无生生四土，见犹离见见三身。
须知真妄原同体，迷悟由来总在人。（二十）

才劝往生言著相，尽思贪恋却迷蒙。
无生毕竟有生在^①，离相依然住相中^②。
念与佛融方是即^③，心将境异不知空^④。
会须心佛双忘后，日照山川处处通。（二一）

都言净土唯心是，十万余程是外求。
但执妄心居在内^⑤，不知真性体全收^⑥。
弥陀诸佛镜中影，极乐娑婆水上沤。
取舍厌欣无挂碍，自家屋里任优游^⑦。（二二）

尽说厌欣为障道，谁知净业善资成。

-
- ① 有执断见者言：死后永灭，都无生处。不知业牵识走，毕竟复入胞胎。除却念佛往生，更无有脱离处。
- ② 若言死后永灭，不求无生，名不著相。是则离缘起相，生断灭相。断灭相者，是邪见法。
- ③ 荆溪云：“体不二故，方名为即。”近世聪明之士，皆言即心即佛。及劝念佛，便言著相。不知念佛、念心，本来一体。但执念心，不信念佛，则心佛是二，何名为即。
- ④ 即事显理，名为真空。拨事求理，名恶取空。近世聪明之士，亦知心净土净。语以净土，便言著相。不知心外无土，土外无心。但执唯心，不信净土，则心与土，划而为二。此恶取空，非真空也。
- ⑤ 若言十万亿佛国之西方是外求者，则认方寸妄心居内，便同阿难所计七处之一。
- ⑥ 《楞严经》云：“当知虚空生汝心内，犹如片云点太清里，况诸世界在虚空耶。”
- ⑦ 欣自心之净，故取。厌自心之秽，故舍。一取一舍，不碍唯心，何外之有。

厌离未切终难去，欣爱非深岂易生？
何处安居能徙宅？谁人无事肯登程？
铁围山外莲华国，掣断情缰始放行。（二三）

人疑念佛恐成魔，魔佛相争不较多。
了境唯心无挂碍^①，将心取境便淆讹^②。
国君愤愤民方扰，室主惺惺盗敢过^③？
须信佛心常护念^④，波旬束手更谁何。（二四）

都言处处是西方，平地高山总不妨^⑤。
入厕岂宜还塞鼻，冲泥何事尚褰裳^⑥？
病来哪得心无苦，梦里焉知身在床。
莫话空言违实行，好凭落日望还乡。（二五）

尽说西方是小乘，小乘原自不相应^⑦。

① 但了佛从心现，外境本空，则虽魔即佛。

② 不知境自心生，取著为有，则虽佛即魔。

③ 一念取著，则魔得其便。妄心不起，则鬼不奈何。

④ 《弥陀经》云：念佛之人。一切诸佛之所护念。

⑤ 古云：“高山平地总西方。”此是真实到家之语，若未到家，便成戏论。

⑥ 塞鼻、褰裳，即是秽相未空。处处西方，岂非妄想。

⑦ 《法华经·信解品》，迦叶等四大弟子白佛言：“但念空、无相、无作。于菩萨法，游戏神通，净佛国土，成就众生，心不喜乐。”故知净土法门，是菩萨所行，非小乘事。盖如来在小乘教中，不说有他方佛土，唯大乘方等经中，广谈十方佛国，而谆谆唯指归西方净土一门。故西域稟小乘教者，都不信有弥陀佛国往生之事。学大乘者，多修此法。今人反谓净土是小乘法，大乘所不为，岂不大颠倒耶。

须知念佛还成佛^①，大胜为僧又作僧^②。
白社远公咸愿往^③，华严大士亦求登^④。
攀龙附凤知何限，底事吾侪不愿升？（二六）

余教修行歧路曲，此门直入坦途平。
三祇行远终难就，十念功成便往生^⑤。
大石载舟还不没^⑥，苍蝇附骥始堪行。
扬帆顺水因风便，何惮迢迢十万程？（二七）

休言极乐苦难生，才说难生是障门^⑦。
佛力自能除业力，信根端可拔疑根^⑧。

-
- ① 云栖云：“念佛成佛，是亲种子。故《华严》十地文，地地不离念佛。”
- ② 大智律师云：“近见禅讲宗师，有发愿来生童真出家者。尝试语言：汝今已得男子出家，合求出离。何乃复求男子，再愿出家，略无胜进乎？”
- ③ 晋慧远法师，于庐山集众念佛。刻木为莲，具十二叶。引流泉入池，每度一时，水激莲开一叶。昼夜六时，禅诵不辍。与会诸贤，往生甚众。
- ④ 《华严·行愿品》普贤菩萨偈云：“愿我临欲命终时，尽除一切诸障碍，面见彼佛阿弥陀，即得往生安乐刹。”
- ⑤ 藏教修行，要经三祇百劫方成佛道。圆教念佛，但凭十念一念，便得往生。此则教门顿渐不同，自他功力有异。盖余法修行，多凭自力。念佛一门，兼藉他力。他力易就，故十念即生。自力难成，故三祇尚滞。有谓西方极乐，非一生可到，须经多世展转修行，方得往生。此不知教门殊胜，佛力难思也。
- ⑥ 《那先经》云：如持百枚大石，置于船上，因船力故，石不没水。若无其船，小石亦没。大石喻重罪，船喻佛力，不没喻不堕三途。无船喻无佛力，小石喻轻罪。
- ⑦ 障门有三：一疑业力深重，二疑福力轻微，三疑修行日浅。有此三疑，不得往生。
- ⑧ 须信弥陀愿力深重，尚不弃五逆十恶，何况善人。尚收功于十念一念，况复多念。

深逃私债藏王府^①，现受官刑遇圣恩^②。
早晚相从裹粮去，此生终不负慈尊。(二八)

莫执《坛经》排净土^③，祖机佛语并圆融。
因言荐理彰吾教，得意忘言显本宗。
十善齐修焉造罪，群贤共会岂还蒙？
他方此土何来去，法界明明在眼中。(二九)

念佛若言真漱口^④，诵经应不用开唇。
药能医病还成病，火本温身反炙身^⑤。
佛见未生除甚么^⑥，凡情尚在断何因？
劝君莫漫闲言语，只要今生出苦轮。(三十)

念佛圆通摄六根，耳根谁谓独超伦^⑦？

① 一入西方，冤业不能违害。

② 亲蒙佛力，冥府不得勾牵。

③ 《坛经》云：“东方人造罪，念佛求生西方。西方人造罪，念佛求生何土？”此意正劝人修善，不言无净土，亦非谓西方实有造罪之人。当以意逆志，不可以辞害意。

④ 赵州云：“念佛一声，漱口三日。”今人便谓不必念佛，莫错会好。

⑤ 天台云：“般若如火聚，四边不可触。触则被烧，不触则温身熟食。”古人一时遣著之语，今人执之，作实法会，岂非被烧乎。

⑥ 赵州云：“佛之一字，吾不喜闻。”古人真实证到这个田地，方开大口。今人口谈禅理，心轻实行。尚未除恶见，何况善见？尚未起三乘见，何况佛见？尚未起佛见，云何而除佛见。

⑦ 人知《楞严》圆通，耳根殊胜，不知念佛即摄耳根。

音闻既是圆常体，名字元非生灭因^①。
以念念名名固切，将闻闻佛佛还亲。
由来二圣皆昆仲，同作弥陀辅弼臣。（三一）

不信西方不愿生，都由执计未能清。
持冰唤水须融水^②，指木为楹岂是楹^③？
己佛还从他佛显，正因须藉了因明。
殷勤苦口缘何事，只为娑婆是火坑。（三二）

悟后莫言休见佛，应知悟后正求生^④。
童蒙未可离师学，稚子犹宜傍母行。

① 问曰：经言：“诸行是无常，念性元生灭。”念性尚是生灭，况名字耶？答曰：经文为顺此方之机，于诸门拣择一门，令初心入道，故有抑扬。实则二十五圣，皆具圆通常义。故曰：“圣性无不通，顺逆皆方便。”言“无不通”，则知无不圆常，岂名字独成生灭耶？又问：圣性虽无不通，初心入道，岂无迟速优劣？答：别论虽尔，通论不然。念佛既摄耳根，则同是一门，何分优劣？又念佛主于意根，遍摄五根。耳根唯属于耳，不兼余根。耳根从一门深入，念佛则根根可入。当知耳根不摄念佛，念佛能摄耳根。故此一门，三根普被。

② 或谓：即心是佛，何须更见弥陀。今释曰：言即心是佛者，如持冰唤水。冰虽是水，结滞未融，须假太阳，方能和解。心虽是佛，全体在迷，须假佛日，方能开悟。岂可固执迷心，而不愿见佛乎。

③ 或谓：即心净土，何以更生净土？今释曰：言即心净土者，如指木为楹。木虽可以为楹，而不即是楹。心虽能造净土，而非即是净土。今试自问，十二时中，于一切境缘上，还起一毫杂念染污心否？若有一毫杂念染污，即是秽相未空，云何言即心净土？如是之言，皆为自欺。故知若不往生，唯心净土终不得显。

④ 天如云：“汝若悟心，则净土往生，万牛不能挽矣。”

喆老后身体更蹈^①，青公覆辙岂堪成^②。
会须亲证无生后，回入娑婆度有情。（三三）

借问往生何计策？须凭信行愿俱全。
信根先向心田种，行足还加愿力坚。
路乏资粮终不到^③，马无缰御孰能前^④？
但将三事为符契，携手同登九品莲。（三四）

念佛休嫌妄想多，试观妄想起于何？
无心收摄固成病，著意遣除亦是魔。
救火抱薪添烈焰，开堤引水作长河。
直须字字分明念，念极情忘有甚么？（三五）

佛声易可除昏散，出口还收入耳来。
蓦地乱茅随火尽，蔽天浓雾逐风开。
通身是佛谁为念？遍界生莲不用栽。
何待临终生极乐？即今端坐玉楼台。（三六）

弥陀四字绝商量，只贵专持不暂忘。

① 宋喆老，住京师大刹，四十年不睡，坐禅精苦。坐化后，纸袄亦烧出舍利。
后生大富贵处，一生多受忧苦。

② 宋青草堂，后身作曾鲁公。

③ 有信愿无行。

④ 有信行无愿。

若厌平常终隔断，才求玄妙便乖张。
粗尝橄榄宁知味？细嚼盐齏始见香。
念到身心空寂处，不劳开口问西方。（三七）

念弥陀佛贵专精，念到功深念自纯。
念念圆明真性体，声声唤醒本来人。
婴儿堕水频呼母，荡子还家始见亲。
却话从前离别事，翻令呜咽泪沾巾。（三八）

欲得工夫无间断，直须精进始相应。
暂时失念云霾日，瞥尔生心蛾掩灯。
小水长流终贯石，沸汤停火亦成冰。
往生作佛浑闲事，只在当人念力能。（三九）

念佛欲知端的处，个中殊不计功程。
尘消古镜光逾远，风定寒潭水自平。
四性本空心历历，三身叵得佛明明。
一门具足诸方便，止观匪从渐次成。（四十）

行时正好念弥陀，一步还随一佛过。
足下时时游净土，心头念念绝娑婆。
傍华随柳须回顾，临水登山莫放他。
等得阿侬生极乐，十方来去任如何。（四一）

住时念佛好观身，四大之中哪一真？
我与弥陀非两个，影兼明月恰三人。
空房渐朽应难住，腐栋将颓岂易蹲？
何日如蝉新脱壳，莲华胎里独栖神。（四二）

坐时观佛足跏趺，身在莲台华正敷。
毫相分明随念见，金容映现与心符。
事如梦幻元空寂，理到圆融非有无。
何日池头捧双足，亲蒙顶上灌醍醐？（四三）

卧时念佛莫开声，鼻息之中好系名。
一枕清风秋万里，半床明月夜三更。
更无尘累心难断，唯有莲华梦易成。
睡眠朦胧诸佛现，觉来追记尚分明。（四四）

僧

僧宜念佛痛加鞭，得预莲池清净缘。
亲听法非徒对本，顿明心不用参禅。
明师岂若弥陀好？善友谁居补处前？
一念遍游诸佛国，笑他行脚困山川。（四五）

儒

此方正教在儒宗，但尽今形后世空。
仁义躬行虽切实，死生才话却朦胧。
好寻归路思安养，莫认邮亭作故宫。

净土原从忠孝得，金台上品奏元功。（四六）

道

道家搬运为延龄，用力偏多功少成。

要识神仙非不死^①，须知净土始长生^②。

持金作钏终无变，弄泡成珠但有名^③。

寄语学仙宜念佛，莲池端的胜蓬瀛。（四七）

仕

求官常恨做官卑，官愈高时势愈危。

太璞不完惭美玉，泥途曳尾羡灵龟。

已知仕宦空无味，试看弥陀念是谁？

案牍虽忙姑少置，朝朝十念不宜亏^④。（四八）

隐

处士逃名远市闾，此身清隐翠微间。

平分岭上半边月，高枕床头一片山。

-
- ① 《楞严经》云：“复有从人，不依正觉，修三摩地。别修妄念，存想固形。游于山林，人不及处。有十种仙，寿千万岁。斯亦轮回，妄想流转。报尽还来，散入诸趣。”
- ② 后魏昙鸾法师，初受陶隐居《仙经》十卷，专事修炼。后遇菩提流支，问曰：“佛道有长生乎？”支曰：“长生不死，我佛道也。”遂以《十六观经》与之，曰：“学此则三界无复生，六道无复往。其为寿，不可穷也。”鸾于是遂焚《仙经》，而专修《观经》。
- ③ 或问：我学仙，则现世便得长生。汝念佛，则现身便死，长生何在？答曰：汝执幻身为坚固，如弄泡成珠，有名无实。我知心性为真常，如持金作钏，终无变易。又神仙寿命，千年易尽，如弄泡成珠。西方寿命，劫石难量，如持金作钏。
- ④ 十念者，每日清晨，向西正立合掌，连声称阿弥陀佛，尽一气为一念。如是十气，名为十念。尽此一生，不得一日暂废。若能如是，决定往生。

白屋安贫终暂计，夕阳归路岂知还？
莲华佛国深深处，出世芳踪不可攀。（四九）

工

百工居肆易成功，业有专门各不同。
旋转化工归手内，挽回造物在胸中。
从来命不由人做，只有心堪自己攻。
随分妻孥且安乐，团圞头念佛丛丛。（五十）

商

商客经年道路行，舟车迅速每兼程。
利深不觉风涛险，物重翻将性命轻。
长恨货多难长价，焉知身死不重生？
劝君念佛归西去，利比娑婆万倍赢。（五一）

渔

渔人活计在扁舟，南北东西任去留。
劈破月华沉棹底，移来山色上船头。
常教妻子张罗网，谁识阎翁下钓钩？
苦海无边休陷溺，早凭佛力忏深尤。（五二）

樵

樵夫家住碧山垠，斤斧声中倒乱薪。
斫断云根穿地脉，凿开石齿露峰唇。
但看旧冢埋枯骨，不见新坟起死人。
及早回头寻出路，莲华胎里好藏身。（五三）

耕

农人念佛好殷勤，旋种新秧手自分。
片笠冲开杨柳雨，一犁耕破杏花云。
曲肱饱饭欣秋熟，回首思乡望夕曛。
一片琉璃田地美，天然殊不用耕耘。（五四）

读

世间万事总浮尘，只有诗书差可人。
千卷西窗残月夜，数编东阁乱山春。
吟声未若佛声好，书味何如道味真？
识得自心清净土，文章糟粕不堪陈。（五五）

营福

一等世人修福业，希图来世作公卿。
假饶位极五侯贵，何似身居下品生。
施水但滋贪种子^①，善芽翻长业根茎^②。
愿回有漏成无漏^③，早注华间第一名^④。（五六）

外道

一心差处路歧逢，自造经书立本宗^⑤。
两扇门边传秘诀，三家村里聚群蒙。
乐邦有路元平直，佛法无私本至公。

① 因贪富贵而行布施。

② 因布施而招富贵，因富贵而造业，因造业而复堕三途。

③ 以此福业，回向西方，即成无漏。

④ 此方念佛，西方七宝池中，即生莲华一朵，标名其上，身后托生其中。

⑤ 即今五部六册之类，皆偷窃佛经，杂以鄙语，以成己典。

奉劝回头归正教，弥陀念念见真空。（五七）

尼师

尼师念佛好随缘，莫向深闺处处穿。
自守清贫为服药，休营痴福更招愆^①。
情根断似枯丝藕，戒体芬如出水莲。
他日神栖安养国，七珍池上礼金仙。（五八）

贫

贫人念佛莫踌躇，寒饿肠中爱易除。
灶脚日斜烟未起，屋头露落被还虚。
深知此界为囚槛，极厌残骸是溃疽。
无限天衣诸化食，他年极乐任安居。（五九）

富

家道休夸堪敌国，从来贵德贱金铜。
无双富莫如原宪，第一贫唯是石崇。
徒有千箱遗子息，难将一物见阎翁。
何如念佛生安养，自性财源用不穷。（六十）

贵

贵人虽贵未为欣，死后还他一个坟。
三谢园亭空燕子，五侯门户但寒云。
身登上品方为贵，心悟真如始立勋。
却到莲池更回首，世间蝼蚁尽纷纷。（六一）

① 古人云：“有为之功，多诸过咎，天堂未就，地狱先成。”

贱

宿业今招下贱身，从来眉眼未曾伸。
频年辛苦恒随主，毕世勤劳敢怨人？
好向己躬勤念佛，偏宜净土独栖神。
他时得预莲池会，入圣超凡贵绝伦。（六二）

智

智人业识每弯环，好把从前念尽删。
六个字中无计较，一声佛外绝机关。
物情料破宁知死，世事多能只欠闲。
毕竟往生为上策，早寻归路自知还。（六三）

慧

慧业文人道易成，休夸才思负聪明。
数篇未足充饥饿，半字何曾敌死生？
绮语化为真实语，吟声翻作苦空声。
乐邦大有佳章在，水鸟风枝尽会赓。（六四）

愚

愚夫造罪恣贪瞋，肯信从来果与因？
只道现生无后世，可知今日有明晨^①？
新移宅舍犹迷向，才换衣裳不识人。
生死关头真痛切，劝君念佛莫辞频。（六五）

① 或问曰：明晨可见，后世何人能见？答曰：天眼能见，汝既无天眼，又不信佛语，是以不见后世。又问：天眼能见，其相云何？答曰：如见人从一房出，复入一房，死此生彼，亦复如是。

痴

痴人垂老不知休，唤杀朦胧未转头。
毒病偏将医作恶，沉疴翻与药为仇。
爱绳易缚禽投檻，欲饵能牵鱼上钩。
奉劝世缘宜早悟，莲池种子尚堪投。（六六）

苦

世间唯有苦人多，自造新殃可奈何。
满地蓬蒿春不到，一身枷锁夜难过。
称冤莫更呼天地，叫痛应须念佛陀。
三界从来是牢狱，劝君及早出娑婆。（六七）

乐

莫道人间乐事稠，由来乐极转生忧。
满城华柳携佳客，彻夜笙歌醉画楼。
但觉酒来人面上，哪知死在脚跟头。
西方净土真为乐，但念弥陀便往游。（六八）

闲

闲人念佛正优游，莫把光阴空里投。
老有音书头渐白，死无官帖命难留。
身前预把资粮办，眼底休为儿女愁。
家在乐邦归去好，自然衣食不须谋。（六九）

忙

劝君念佛未能闲，等得闲来病现前。
心到乱时须著眼，念从忙处要加鞭。

千军队里单刀入，百沸汤中勺水传。
佛不碍忙忙自碍，便从今日奉金仙。（七十）

少

少年念佛正精神，莫待衰迟始问津。
青草半埋红粉骨，黄泉多见黑头人。
献珠龙女疾成佛，访道善财还证真。
一旦无常音信至，此时追悔欲何因？（七一）

老

暮年光景苦无多，电影沅华一刹那。
黄叶渐凋真老矣，秋风将至奈愁何。
无心不用贪浮世，有口唯应念佛陀。
珍重临行须努力，莫教万劫自蹉跎。（七二）

病

疾病由来是药方，深知生死是无常。
重刑受过悲牢狱，剧苦尝来厌革囊。
念念弥陀休背觉，心心极乐愿还乡。
何时得受清虚体，寿极河沙不可量。（七三）

死

死时莫漫自惊惶^①，系念殷勤向彼方。
脓血渐抛皮袋子，腥臊将脱垢衣裳。
多生烦恼真痼疾，一句弥陀是药王。

① 念佛人第一切忌怕死，怕死则不得往生。多有一生念佛，临终唯务服药求医，都不说着往生之事，此怕死之过也。

苦海深沉但求出，莫愁佛不驾慈航。（七四）

寅时

平旦寅时天气清，东方晓色已初生。
法身未显仍居暗，慧眼才开始见明。
安得乐邦今日去？都将妄习一时平。
遥思供佛诸贤辈，衣袂盛华手自擎。（七五）

卯时

卯时日出气苍茫，万象明明不覆藏。
香雾从中华影乱，红尘队里马蹄忙。
想成处处青莲萼，念熟时时大觉王。
直待无生生净土，遍周沙界是毫光。（七六）

辰时

食时万户起炊烟，贫富由来事太悬。
茅屋糟糠犹不继，朱门酒肉尚憎嫌。
梦中苦乐原无实，觉后身心始不迁。
安养此时应坐食，遥知百味现其前。（七七）

巳时

巳时日影在禺中，恰恰还差分寸工。
正念觉来犹有觉，妄心空处未忘空。
边邪哪个非中正，偏曲何人不至公？
摄受三根归净土，直教万派尽朝宗。（七八）

午时

日轮当午正中天，普见高低物像全。

阿鼻狱中真净土，蛞蝓身里紫金仙。
迷家荡子殊堪愍，背父痴儿信可怜。
今日始知归故里，劫初田地尚依然。（七九）

未时

未时窗外日初斜，华影阑珊上碧纱。
三分光阴还过二，百年身世岂无涯？
暂居此地非吾土，遥忆西方是我家。
极乐人民无量寿，不将日月计年华。（八十）

申时

晡时薄晚正逢申，业识茫茫丧本真。
赡部洲中多苦事，娑婆界内少闲人。
食中置毒焉知避？痒后搔疮岂厌频？
日暮飘零不归去，空劳望断倚门亲。（八一）

酉时

酉时忆佛甚悬悬，独倚楼头耸两肩。
眼逐浮云凝碧落，心随白日下青天。
更无人去乾坤外，哪有书来鸿雁边？
坐久不知天已暮，却疑身在玉池莲。（八二）

戌时

戌时万事且休论，要把无常念念存。
大限忽来真黑夜，幽关不晓是黄昏。
持珠易念生前佛，剪纸难招死后魂。
预办资粮早归去，莫教前路悔无门。（八三）

亥时

亥时人定绝喧嚣，痛策身心莫漫憍。
斩断妄心青草死，推开昏暗黑山高。
泪因忆佛浑难制，愁为思乡不易消。
遥想白莲华萼上，定知名字已曾标。（八四）

子时

夜半子时群动息，阴阳往复互回旋。
一轮孤月千家梦，几点残星万里天。
土自想成宁有外？佛从心现本无边。
何时永灭迁流苦？华里藏身出盖缠。（八五）

丑时

丑时后夜晓鸡鸣，起坐披衣忆想清。
一念未生真佛现，万缘才动假名成。
知缘不实名何碍？达妄无依念自平。
安得身心归极乐？真空幻有总无生。（八六）

正月

春王正月是新年，贺岁家家设酒筵。
万户笙歌行乐地，满街华月上灯天。
目前景物难长好，劫外风光自不迁。
安养故乡无蜡烛，枝枝相照玉池莲。（八七）

二月

时当二月景堪夸，好念弥陀玩物华。
浅白梨花初破朵，淡黄杨柳乍抽芽。

轻烟薄雾莺儿店，细雨微风燕子家。
争似故乡佳丽地，七重行树语频伽。（八八）

三月

三月清明瞥眼过，伤心无那是愁何！
满城风雨歌声少，十里山坟哭响多。
早趁在生修净业，莫教临死怨阎罗。
故乡春色还长在，想见芙蓉出绿波。（八九）

四月

山林四月少尘埃，自念弥陀不用陪。
新脱素衣摧粉箨，乱抛金弹落黄梅。
穷途作客真为苦，荡子思乡最可哀。
料得慈尊应念我，朝朝垂手望归来。（九十）

五月

五月端阳景物偏，龙舟竞渡古今传。
数茎蒲叶剑刻砺，一树榴花火欲燃。
苦海无边何日出？乐邦有路几时还？
玉池流水洄漩处，阵阵香风泛白莲。（九一）

六月

六月人间景气高，炎炎火宅被焚烧。
一林树影藏高阁，十里荷华映画桥。
念佛声悲频有泪，思乡心切更无聊。
清凉池上何时返？涤尽烦襟水自饶。（九二）

七月

新秋七月气初凉，溽暑将收夜渐长。
四壁暗风鸣蟋蟀，一池衰草语寒蛩。
深宵倚槛窥残月，薄暮推窗望夕阳。
客路岭岵久漂泊，苦求佛力早还乡。（九三）

八月

中秋八月有微寒，零露泑泑被草菅。
一树桂华香漏洩，万家明月影团圞。
长思故国无音信，几欲高飞少羽翰。
行树重重含佛土，何时亲倚玉栏看？（九四）

九月

重阳九日景偏赊，自采茱萸且泛茶。
红锦妆成千树叶，黄金开尽一篱华。
每登山顶瞻乡国，却上楼头望故家。
想见七珍池沼内，枝枝菡萏大如车。（九五）

十月

十月由来是小春，桃红初破一枝新。
长看旧冢添新冢，每见新人送旧人。
万劫死生谁动念，百年身世独伤神。
回头便是西方路，只要当人愿力真。（九六）

十一月

天涯又见一阳生，六管飞灰气乍更。
粒粒寒椒梅渐破，尖尖嫩玉柳将萌。

夜长易得还乡梦，岁暮难为作客情。
十万余程安养国，寸心耿耿挂长庚。（九七）

十二月

岁尽时穷最可愁，阴云惨惨日悠悠。
风刺万木皆枯骨，雪覆千山尽白头。
但见过年忙似箭，有谁离苦急如仇？
哪堪尚滞娑婆国，梦里光阴又一周。（九八）

一自娑婆系业因，多生流转实酸辛。
须臾出屋又投屋，迅速舍身还受身。
曾作王侯争国邑，几为蝼蚁丧埃尘。
这回若不思归去，依旧从前受苦轮。（九九）

弥陀慈父愿门开，摄受群生等一孩。
脓血团中离臭秽，莲华香里受胞胎。
但凭净愿为良导，只有狐疑是弃材。
浊恶娑婆难久住，早同善友赋归来。（一〇〇）

生苦

业风吹识入胞胎，狱户深藏实可哀。
每遇饥虚倒悬下，频惊粗食压山来。
声闻到此心犹昧，菩萨于中慧未开。
誓割爱缘生极乐，华中产取玉婴孩。（一〇一）

老苦

万事输人已退藏，形骸自愧少康庄。
朱颜一去杳无迹，华发新来渐有霜。
流泪暗思童稚乐，见人空话壮年强。
宁知净土春长在，不使身心昼夜忙。（一〇二）

病苦

四大因时偶暂乖，此身无计可安排。
残灯留影不成梦，夜雨滴愁空满街。
自昔欢娱何处去？只今苦痛有谁怀？
岂知极乐清虚体，自在游行白玉阶？（一〇三）

死苦

识神将尽忽无常，四大分离难主张。
脱壳生龟真痛绝，落汤螃蟹漫惶惶。
甘心狱户为囚侣，束手幽关事鬼王。
何似华开亲见佛，无生无灭寿难量。（一〇四）

爱别离苦

生离死别最堪伤，每语令人欲断肠。
虞氏帐中辞项羽，明妃马上谢君王。
泪深江海犹嫌浅，恨远乾坤未是长。
诸上善人俱会处，愿教旷劫莫分张。（一〇五）

怨憎会苦

苦事人情皆欲避，谁知夙业自相招？
有钱难买阎翁赦，无计能求狱卒饶。

兵败张巡思作鬼，身亡萧氏愿为猫。

何时得预莲池会，积劫怨仇好共消。（一〇六）

求不得苦

穷达由来有夙因，转生希望转因循。

扬帆屡见沉舟客，挂榜偏伤落第人。

毕世耕耘难果腹，频年纺织尚悬鹑。

乐邦衣食天然好，不用区区更苦辛。（一〇七）

五阴炽盛苦

逼迫身心苦事多，哀声无地可号呼。

肝肠断处情难断，血泪枯时恨未枯。

临海廿年持使节，遇关一夜白头颅。

何当净土修禅观，寂照同时离有无。（一〇八）

（色、受、想、行识为五阴。色阴是身，四阴是心。

炽盛者，炽然增盛也。）

发愿偈

稽首释迦文，娑婆说法主。

皈依无量寿，净土之导师。

我今承佛力，阐扬净土教。

诗成百八章，章各有八句。

为顺此方机，故以诗演说。

若我所说语，违背于诸佛，

欺罔世人者，应受地狱苦，

百千万亿劫，犹故不能尽。

如其不然者，幸各生谛信，
慎勿怀疑惑，而生增上慢，及以卑劣慢，
由斯二种心，自致失善利。
伏愿见闻者，展转递相劝，
若有劝一人，乃至于多人，
功德不思议，譬喻莫能尽。
愿以此功德，普及于一切，
我等与众生，同生极乐国。

